

॥ कूष्माण्ड-होम-मन्त्राः ॥

यद्दे॒वा दे॒व॒हेळ॑नं॒ दे॒वांस॑श्च॒कृ॒मा व॒यम्। आदि॑त्या॒स्तस्मा॑न्मा
मु॒ञ्च॒त॒र्त॒स्य॒र्ते॒न॒ मा॒मि॒त॒ स्वाहा॑॥१॥

(देवेभ्य आदित्येभ्य इदं न मम)

दे॒वा जी॒वन॑का॒म्या य॒द्वा॒चाऽनृ॑त॒मू॒दि॒मा। तस्मा॑न्न इ॒ह मु॑ञ्च॒त॒
वि॒श्वे दे॒वाः स॒जोष॑सः॒ स्वाहा॑॥२॥

(विश्वेभ्यो देवेभ्य इदं न मम)

ऋ॒तेन॑ द्या॒वापृ॑थि॒वी ऋ॒तेन॑ त्व॒ः सं॒र॒स्व॒ति। कृ॒ता॒न्नः पा॒ह्येन॑सो
य॒त्किं चा॑नृ॒त॒मू॒दि॒म॒ स्वाहा॑॥३॥

(द्यावापृथिवीभ्यां सरस्वत्या इदं न मम)

इ॒न्द्रा॒ग्नी मि॒त्राव॑रु॒णौ सो॒मो धा॒ता बृ॒ह॒स्प॒तिः। ते नो॑
मु॒ञ्च॒न्त्वेन॑सो॒ यद॒न्य॒कृ॒त॒मा॒रि॒म॒ स्वाहा॑॥४॥

(इन्द्राग्निभ्यां मित्रावरुणाभ्यां सोमाय धात्रे बृहस्पतय इदं न मम)

स॒जा॒त॒श॒ः सा॒दु॒त जा॑मि॒श॒ः सा॒ज्या॑य॒सः॒ श॒ः सा॒दु॒त वा॑
क॒नी॒य॒सः। अ॒नाधृ॑ष्टं दे॒व॒कृ॒तं य॒देन॑स्तस्मा॒त् त्वम॑स्मा॒जा॒त॒वे॒दो
मु॒मु॒ग्धि॒ स्वाहा॑॥५॥

(अग्नये जातवेदस इदं न मम)

यद्वा॒चा य॒न्मन॑सा बा॒हु॒भ्यामू॒रु॒भ्याम॑ष्ठी॒व॒द्वा॒ः शि॒श्रैर्य॑द॒नृ॒तं
च॒कृ॒मा व॒यम्। अ॒ग्नि॒र्मा तस्मा॑देन॑सो॒ गार्ह॑प॒त्यः प्र॑मु॒ञ्च॒तु

चकृम यानि दुष्कृता स्वाहा॥६॥

(अग्नये गार्हपत्याय इदं न मम)

येन त्रितो अर्णवान्निर्बभूव येन सूर्यं तमसो निर्मुमोच। येनेन्द्रो विश्वा अजहादरातीस्तेनाहं ज्योतिषा ज्योतिरानशान आक्षि स्वाहा॥७॥

(अग्नये ज्योतिष इदं न मम)

यत्कुसीदमप्रतीतं मयेह येन यमस्य निधिना चरामि। एतत्तदग्रे अनृणो भवामि जीवन्नेव प्रति तत्तं दधामि स्वाहा॥८॥

(अग्नय इदं न मम)

यन्मयि माता गर्भे सति। एनश्चकार यत्पिता। अग्निर्मा तस्मादेनसः। गार्हपत्यः प्र मुञ्चतु। दुरिता यानि चकृम। करोतु मामनेनसः स्वाहा॥९॥

(अग्नये गार्हपत्याय इदं न मम)

यदा पिपेष मातरं पितरम्। पुत्रः प्रमुदितो धयन्। अहिंसितौ पितरौ मया तत्। तदग्रे अनृणो भवामि स्वाहा॥१०॥

(अग्नय इदं न मम)

यदन्तरिक्षं पृथिवीमुत द्यां यन्मातरं पितरं वा जिहिंसिम॥ अग्निर्मा तस्मादेनसः। गार्हपत्यः प्र मुञ्चतु। दुरिता यानि

चकृ॒म। क॒रोतु॒ माम॑ने॒नस॒ः॒ स्वाहा॑॥११॥

(अग्नये गार्हपत्याय इदं न मम)

यदा॑शसा॑ नि॒शसा॑ यत्प॑रा॒शसा॑॥ यदे॑न॒श्चकृ॑मा नू॒तनं॑
यत्पु॑रा॒णम्। अ॒ग्निर्मा॑ तस्मा॒देन॑सः। गा॒र्हप॑त्यः प्र मु॑ञ्चतु।
दु॒रिता॑ या॒नि चकृ॑म। क॒रोतु॒ माम॑ने॒नस॒ः॒ स्वाहा॑॥१२॥

(अग्नये गार्हपत्याय इदं न मम)

अति॑ क्रामामि दु॒रितं॑ यदे॑नः। जहा॑मि रि॒प्रं प॑र॒मे स॒धस्थे॑।
यत्र॑ यन्ति॑ सु॒कृतो॑ नापि॑ दु॒ष्कृतः॑। तमा॑ रो॒हामि॑ सु॒कृतां॑ नु
लो॒कः॒ स्वाहा॑॥१३॥

(अग्नय इदं न मम)

त्रि॒ते दे॒वा अ॑मृज॒तैतदे॑नः। त्रि॒त ए॒तन्म॑नु॒ष्येषु॑ मामृजे। ततो॑
मा॒ यदि॑ किञ्चि॑दान॒शे। अ॒ग्निर्मा॑ तस्मा॒देन॑सः। गा॒र्हप॑त्यः
प्र मु॑ञ्चतु। दु॒रिता॑ या॒नि चकृ॑म। क॒रोतु॒ माम॑ने॒नस॒ः॒ स्वाहा॑॥१४॥

(अग्नये गार्हपत्याय इदं न मम)

दि॒वि जा॒ता अ॒प्सु जा॒ताः। या जा॒ता ओष॑धी॒भ्यः। अथो॑
या अ॑ग्नि॒जा आपः॑। ता नः॑ शु॒न्धन्तु॑ शु॒न्धनीः॑ स्वाहा॑॥१५॥

(अद्ध्यः शुन्धनीभ्य इदं न मम)

यदा॑पो न॒क्तं दु॒रितं॑ चरा॑म। यद्वा॒ दिवा॑ नू॒तनं॑ यत्पु॑रा॒णम्।
हि॒र॒ण्यव॑र्णा॒स्तत् उत्पु॑नीत नः॑ स्वाहा॑॥१६॥

(अद्ध्यो हिर्ण्यवर्णाभ्य इदं न मम)

इ॒मं मे॑ वरु॒ण श्रु॒धी हव॑म॒द्या च॑ मृ॒ळय। त्वाम॑व॒स्युराच॑के॒
स्वाहा॑॥१७॥

(वरुणाय इदं न मम)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो
ह॒विर्भिः॑। अहै॑ळमानो वरु॒णेह॒ बो॒द्ध्युरु॑श॒स मा न॒ आयुः॑
प्रमो॑षीः स्वाहा॑॥१८॥

(वरुणाय इदं न मम)

त्वं नो॑ अ॒ग्ने वरु॑णस्य वि॒द्वान्दे॒वस्य॒ हेळोऽव॑ यासि॒सीष्ठाः।
यजि॑ष्ठो॒ वह्नि॑तमः॒ शोशु॑चानो॒ विश्वा॒ द्वेषा॑सि॒ प्र
मु॑मु॒ग्ध्यस्म॒त्स्वाहा॑॥१९॥

(अग्नीवरुणाभ्याम् इदं न मम)

स त्वं नो॑ अ॒ग्नेऽव॒मो भ॑वोती नेदि॑ष्ठो अ॒स्या उ॒षसो॒ व्यु॑ष्टौ।
अव॑ यक्ष्व नो॒ वरु॑ण॒ररा॑णो वी॒हि मृ॑ळी॒क सु॒हवो॑ न एधि॒
स्वाहा॑॥२०॥

(अग्नीवरुणाभ्याम् इदं न मम)

प्र ण॒ आयू॑षि॒ तारि॑षत्। त्वम॑ग्ने अ॒यासि॑। अ॒या सन्मन॑सा
हि॒तः। अ॒या सन् ह॒व्यमृ॑हिषे। अ॒या नो॑ धेहि॒ भेष॑जः
स्वाहा॑॥२१॥

(अग्नये अयस इदं न मम)

यददी॑व्य॒नृ॒णम॒हं ब॒भू॒वादि॑त्स॒न्वा स॒ञ्ज॒गर॒ जने॑भ्यः। अ॒ग्नि॒र्मा
तस्मा॑दिन्द्र॒श्च सं॒विदा॑नौ प्रमु॒ञ्चता॑ऽ॒ स्वाहा॑॥२२॥

(इन्द्राग्निभ्याम् इदं न मम)

यद्ध॑स्ता॒भ्यां च॒कर॒ किल्बि॑षाण्य॒क्षाणां॑ व॒श्रुमु॑पजिघ्र॒मानः॑। उ॒ग्रं
प॒श्या च॑ रा॒ष्ट्रभृ॑च्च॒ तान्य॑प्स॒रसा॒वनु॑दत्तामृ॒णानि॒ स्वाहा॑॥२३॥

(उग्रं-पश्य-राष्ट्रभृद्भ्याम् अप्सरोभ्याम् इदं न मम)

उ॒ग्रं प॒श्ये रा॒ष्ट्रभृ॑त्किल्बि॑षाणि॒ यद॒क्षवृ॑त्त॒मनु॑दत्तमे॒तत्।
ने॒त्रं ऋ॒णानृ॑णव॒ इत्स॑मानो य॒मस्य॑ लो॒के अधि॑रञ्जु॒राय॒
स्वाहा॑॥२४॥

(उग्रं-पश्या राष्ट्रभृद्भ्याम् अप्सरोभ्याम् इदं न मम)

अव॑ ते॒ हेडो॑ वरु॒ण नमो॑भि॒रव॑ य॒ज्ञेभि॑रीमहे ह॒विर्भिः॑।
क्षय॑न्न॒स्मभ्य॑मसुर प्रचेतो॒ राज॒न्नेना॑सि शि॒श्रथः॑ कृ॒तानि॑
स्वाहा॑॥२५॥

(वरुणाय इदं न मम)

उदु॑त्त॒मं व॑रु॒ण पा॑श॒मस्म॑दवा॒धुमं॑ वि म॒ध्य॒मऽश्र॑थाय। अथा॑
व॒यमा॑दित्य व्र॒ते तवा॑ना॒गसो॒ अदि॑तये स्या॒म स्वाहा॑॥२६॥

(वरुणाय इदं न मम)

इ॒मं मे॑ वरु॒ण श्रु॒धी ह॑व॒मद्या॑ च॒ मृळ॑य। त्वा॒मव॑स्युराच॒के
स्वाहा॑॥२७॥

(वरुणाय इदं न मम)

तत्त्वा॑ यामि॒ ब्रह्म॑णा॒ वन्द॑मान॒स्तदाऽऽशा॑स्ते॒ यज॑मानो
ह॒विर्भिः॑। अहे॑ळमानो वरुणे॒ह बो॒द्धुरु॑श॒स॒ मा न॒ आयुः॑
प्रमो॑षीः स्वाहा॑॥ २८॥

(वरुणाय इदं न मम)

त्वं नो॑ अग्रे॒ वरु॑णस्य वि॒द्वान्दे॒वस्य॒ हेळोऽव॑ यासिसी॒ष्टाः।
यजि॑ष्ठो वह्नि॒तमः॑ शोशु॑चानो॒ विश्वा॒ द्वेषा॑सि॒ प्र
मु॑मुग्ध्य॒स्मत्स्वाहा॑॥ २९॥

(अग्नीवरुणाभ्याम् इदं न मम)

स त्वं नो॑ अग्रेऽव॒मो भ॑वोती नेदि॑ष्ठो अ॒स्या उ॒षसो॑ व्यु॒ष्टौ।
अव॑ यक्ष्व नो॒ वरु॑ण॒ररा॑णो वी॒हि मृ॑ळी॒क॒सु॒हवो॑ न एधि॒
स्वाहा॑॥ ३०॥

(अग्नीवरुणाभ्याम् इदं न मम)

सङ्कु॑सुको॒ विकु॑सुको॒ निर्ऋ॒थो यश्च॑ निस्व॒नः।
तेऽ(१)स्मद्य॑क्ष्म॒मना॑गसो दू॒रादू॒रम॑चीचत॒स्व॒ स्वाहा॑॥ ३१॥

(सङ्कुसुक विकुसुक निर्ऋथ निस्वनेभ्य इदं न मम)

निर्य॑क्ष्ममचीचते कृ॒त्यां निर्ऋ॑तिं च। तेन॒ योऽ(१)स्मत्स॑मृच्छा॒ते
तम॑स्मै प्र॒सु॒वाम॑सि॒ स्वाहा॑॥ ३२॥

(निर्ऋत्या इदं न मम) [अप उपस्पृश्य]

दुःश॑ꣳसा॒नुश॑ꣳसा॒भ्यां॑ घ॒णेना॑नुघ॒णेन॑ च। तेना॒न्योऽ(१)स्म॒त्समृ॑च्छा॒तै
तम॑स्मै॒ प्रसु॑वामसि॒ स्वाहा॑॥ ३३ ॥

(दुःश॑ꣳसा॒नुश॑ꣳस-घ॒णेना॑नुघ॒णेभ्य॑ इदं न मम)

सं वर्च॑सा॒ पय॑सा॒ सन्त॑नूभि॒रग॑न्महि॒ मन॑सा॒ सꣳ शिवे॑न।
त्वष्टा॑ नो॒ अत्र॑ विद॑धातु रा॒योऽनु॑मार्ष्टु॒ तन्वो(१)॑ यद्वि॒लिष्टः॑
स्वाहा॑॥ ३४ ॥

(त्वष्ट॑ इदं न मम)

आयु॑ष्टे वि॒श्वतो॑ दध॒द्यम॑ग्निर्वि॒र॑ण्यः। पुन॑स्ते प्रा॒ण आया॑ति
परा॒यक्ष्मꣳ सु॑वामि ते॒ स्वाहा॑॥ ३५ ॥

(वरे॑ण्यायाग्रय इदं न मम)

आ॒युर्दा॑ अ॒ग्रे ह॒विषो॑ जुषा॒णो घृ॒तप्र॑तीको घृ॒तयो॑निरेधि।
घृ॒तं पी॒त्वा मधु॑ चा॒रु ग॒व्यं पि॒तेव॑ पु॒त्रम॑भि॒रक्ष॑तादि॒मꣳ
स्वाहा॑॥ ३६ ॥

(आयु॑र्दे अग्रय इदं न मम)

इ॒मम॑ग्र आयु॑षे वर्च॑से कृ॒धि ति॒ग्ममो॑जो वरु॒ण सꣳशि॑शाधि।
मा॒तेवा॑स्मा अदि॒ते श॑र्म यच्छु॒ विश्वे॑ देवा॒ जर॑दष्टि॒र्यथा॑-
ऽस॒त्स्वाहा॑॥ ३७ ॥

(अ॒ग्निव॑रुणादिति-वि॒श्वेभ्यो॑ देवेभ्य इदं न मम)

अग्र॑ आ॒यूꣳषि॑ पव॒स आ॒ सुवो॑र्ज॒मिषं॑ च नः। आ॒रे बा॑धस्व

दुच्छुना॒ꣳ स्वाहा॑॥३८॥

(अग्नये पवमानाय इदं न मम)

अग्ने॑ पव॑स्व॒ स्वपा॑ अ॒स्मे वर्चः॑ सु॒वीर्य॑म्। दध॑द्र॒यिं मयि॑ पोष॒ꣳ
स्वाहा॑॥३९॥

(अग्नये पवमानाय इदं न मम)

अ॒ग्निर्ऋ॑षिः पव॑मानः॒ पाश्च॑जन्यः पुरो॑हितः। तमी॑महे
महा॑ग॒यꣳ स्वाहा॑॥४०॥

(पाश्चजन्याय अग्नय इदं न मम)

अग्ने॑ जा॒तान्प्र॑णु॒दा नः स॒पत्नान्प्र॑त्यजा॒ताञ्जात॑वेदो नुदस्व।
अ॒स्मे दी॑दिहि सु॒मना॒ अहे॑ळ॒च्छर्म॑न्ते स्याम त्रि॒वरू॑थ उ॒द्धौ
स्वाहा॑॥४१॥

(अग्नये जातवेदस इदं न मम)

सह॑सा जा॒तान्प्र॑णु॒दा नः स॒पत्नान्प्र॑त्यजा॒ताञ्जात॑वेदो नुदस्व।
अधि॑ नो ब्रूहि सुमन॒स्यमा॑नो व॒यꣳ स्या॑म प्र॑णु॒दा नः
स॒पत्नान्त्स्वाहा॑॥४२॥

(अग्नये जातवेदस इदं न मम)

अग्ने॑ यो नोऽभि॒तो ज॑नो वृ॒को वा॑रो जिघा॑ꣳसति। ताꣳस्त्वं
वृ॒त्रहं॑ जहि॒ वस्व॒स्मभ्य॒माभ॑र॒ स्वाहा॑॥४३॥

(अग्नय इदं न मम)

अग्ने॒ यो नो॑ऽभि॒दास॑ति॒ समा॒नो यश्च॑ नि॒ष्ठ्यः। तं व॒यं स॒मिधं॑
कृ॒त्वा तुभ्य॑म॒ग्नेऽपि॑ द॒ध्मसि॑ स्वाहा॑॥४४॥

(अग्नय इदं न मम)

यो नः॑ श॒पाद॑श॒पतो॑ यश्च॑ नः॑ श॒पतः॑ श॒पात्। उ॒षाश्च॑ तस्मै॑
नि॒मृक्क॑ सर्वं पा॒पं स॒मूह॑ताऽ॒ स्वाहा॑॥४५॥

(उषो निमृग्भ्याम् इदं न मम)

यो नः॑ स॒पत्नो॑ यो र॒णो म॒र्तोऽभि॒दास॑ति॒ देवाः। इ॒ध्मस्ये॑व
प्र॒क्षाय॑तो॒ मा तस्यो॑च्छे॒षि किं॑ च॒न स्वाहा॑॥४६॥

(अग्नय इदं न मम)

यो मां द्वेष्टि॑ जा॒तवे॑दो॒ यं चा॒हं द्वेष्मि॑ यश्च॑ मा॒म्। सर्वाः॑ऽस्ता॒नग्ने॑
स॒न्दह॑ याऽ॒श्वाहं॑ द्वेष्मि॑ ये च॒ माऽ॒ स्वाहा॑॥४७॥

(अग्नय इदं न मम)

यो अ॒स्मभ्य॑म॒राती॒याद्य॑श्च॑ नो॒ द्वेष॑ते॒ जनः॑। नि॒न्दा॒द्यो
अ॒स्मान्दि॒प्साच्च॑ सर्वाः॑ऽस्ता॒न्मष्म॑षा॒ कुरु॑ स्वाहा॑॥४८॥

(अग्नय इदं न मम)

स॒शितं॑ मे॒ ब्रह्म॑ स॒शितं॑ वी॒र्या(१)॑म्ब॒लम्। स॒शितं॑ क्ष॒त्रं
मे॒ जि॒ष्णु यस्या॒हमस्मि॑ पुरोहि॒तः स्वाहा॑॥४९॥

(ब्रह्मण इदं न मम)

उ॒दैषां॑ बा॒हू अ॑ति॒रमु॒द्वर्चो॑ अथो॒ बल॑म्। क्षि॒णोमि॑

ब्रह्म॑णा॒ऽमित्रा॑नु॒न्नयामि॑ स्वा(१)म् अ॒ह॒ꣳ स्वाहा॑॥५०॥

(अग्नय इदं न मम)

पुन॑र्मनः पुन॑रायु॒र्म आगा॑त्पुन॑श्चक्षुः पुनः॑ श्रोत्रं॑ म॒ आगा॑त्पुनः॑
प्रा॒णः पुन॑राकू॒तं म॒ आगा॑त्पुन॑श्चित्तं पुन॑राधी॒तं म॒ आगा॑त्।
वै॒श्वान॑रो मेऽद॑ब्धस्तनूपा अव॑बाधतां दुरि॑तानि॒ विश्वा॑
स्वाहा॑॥५१॥

(अग्नये वैश्वानराय इदं न मम)

॥ बोधायन-मतानुसारेण अष्टौ होममन्त्राः ॥

सि॒ꣳहे व्या॒घ्र उ॒त या पृ॒दा॒कौ। त्विषि॑र॒ग्नौ ब्रा॑ह्म॒णे सू॒र्ये या।
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना
स्वाहा॑॥१॥

(त्विष्यै देव्या इदं न मम)

या रा॑ज॒न्ये दु॒न्दुभा॑वाय॒तायाम्। अश्व॑स्य॒ क्रन्द्ये॑ पुरु॒षस्य॑
मा॒यौ। इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा
संविदा॒ना स्वाहा॑॥२॥

(त्विष्यै देव्या इदं न मम)

या ह॒स्तिनि॑ द्वी॒पिनि॑ या हि॒र॒ण्ये। त्विषि॑र॒श्वेषु॑ पुरु॒षेषु॑
गोषु॑॥१६॥ इन्द्रं॑ या दे॒वी सु॒भगा॑ ज॒जान॑। सा न॒
आग॑न्वर्चसा संविदा॒ना स्वाहा॑॥३॥

(त्विष्यै देव्या इदं न मम)

रथे॑ अ॒क्षेपुं॑ वृ॒षभ॑स्य॒ वाजे॑। वाते॑ पु॒र्जन्ये॑ वरु॑णस्य॒ शुष्मे॑।
इन्द्रं॑ या दे॒वी सु॒भगा॑ ज॒जान॑। सा न॒ आग॑न्वर्चसा संविदा॒ना
स्वाहा॑॥४॥

(त्विष्यै देव्या इदं न मम)

अग्ने॑ऽभ्यावर्ति॒न्नाभि॑ न॒ आ वर्त॑स्वायु॑षा॒ वर्चसा॑ स॒न्या मे॒धया॑
प्र॒जया॒ धने॑न॒ स्वाहा॑॥५॥

(अग्नये अभ्यावर्तिन इदं न मम)

अग्ने॑ अ॒ङ्गिरः॑ श॒तं ते॑ सन्त्वावृ॒तः स॒हस्रं॑ त उपा॒वृतः॑। तासां॑
पोष॑स्य॒ पोषे॑ण॒ पुन॑र्नो न॒ष्टमा॑ कृ॒धि पुन॑र्नो र॒यिमा॑ कृ॒धि
स्वाहा॑॥६॥

(अग्नये अभ्यावर्तिन इदं न मम)

पुन॑रू॒र्जा नि॑ वर्त॑स्व पुन॑र॒ग्न इ॒षायु॑षा। पुन॑र्नः पाहि वि॒श्वतः॑
स्वाहा॑॥७॥

(अग्नये अभ्यावर्तिन इदं न मम)

स॒ह र॒य्या नि॑ वर्त॑स्वाग्ने॒ पिन्व॑स्व॒ धार॑या। वि॒श्वप्सि॑न्वा
वि॒श्वत॑स्परि॒ स्वाहा॑॥८॥

(अग्नये अभ्यावर्तिन इदं न मम)

॥ उपस्थान-मन्त्राः ॥

(तैत्तिरीयारण्यकम् २-६)

वैश्वान॒राय॒ प्रति॑वेदयामो॒ यदी॑नृ॒णः स॑ङ्ग॒रो दे॒वता॑सु। स
 ए॒तान्पाशा॑न् प्र॒मुच॑न् प्रवे॒द स नो॑ मुश्चातु दु॒रिता॑दव॒द्यात्।
 वैश्वान॒रः प॒व॒यान्नः॑ प॒वित्रै॑र्य॒त्सङ्ग॑रम॒भिधा॑वा॒म्याशाम्॑।
 अना॑जान॒न्मन॑सा याच॑मानो॒ यदत्रै॑नो॒ अव॒ तत्सु॑वामि।
 अ॒मी ये सु॒भगे॑ दि॒वि वि॒चृतौ॑ नाम॒ तार॑के। प्रे॒हामृ॑तस्य
 यच्छ॑तामे॒तद्वद्ध॑क॒मोच॑नम्। वि॒जिही॑र्ष्व लो॒कान्कृ॑धि
 ब॒न्धान्मु॑श्चासि॒ बद्ध॑कम्। योने॑रिव॒ प्रच्यु॑तो॒ गर्भः॑ सर्वा॑न्
 प॒थो अ॑नुष्व। स प्र॑जान॒न्प्रति॑गृ॒णीत॑ वि॒द्वान्प्र॒जाप॑तिः
 प्रथ॑मजा ऋ॒तस्य॑। अ॒स्माभि॑र्दत्तं ज॒रसः॑ प॒रस्ता॑दच्छि॒त्रं
 तन्तु॑मनु॒सञ्चरे॑म॥१॥

त॒तं तन्तु॑मन्वे॒के अनु॑ सञ्च॑रन्ति॒ येषां॑ द॒त्तं पि॒त्र्यमा॑यनवत्।
 अ॒बन्ध्वे॒के द॑द॒तः प्र॑यच्छा॒द्वातुं॑ चेच्छ॒क्रवा॑ः॒ सः स्व॑र्ग ए॒षाम्।
 आ॒र॒भेथा॑मनु॒ सः॒र॒भेथा॑ः॒ समा॑नं पन्था॑मवथो घृ॒तेन॑। यद्वा॑
 पूर्तं॑ प॒रिवि॑ष्टं॒ यदग्नौ॑ तस्मै गो॒त्राये॒ह जा॑यापती॒ सः॒र॒भेथाम्॑।
 यद॒न्तरि॑क्षं पृथि॒वीमु॑त द्यां यन्मा॒तरं॑ पि॒तरं॑ वा जिहि॑ः॒सिमा॑।
 अ॒ग्निर्मा॑ तस्मा॒देन॑सो गार्ह॑पत्य॒ उन्नो॑ नेषद्दु॒रिता॑ या॒नि
 च॒कृम॑। भूमि॑र्मा॒ताऽदि॑तिर्नो ज॒नित्रं॑ भ्रा॒ताऽन्तरि॑क्षम॒भिशा॑स्त
 ए॒नः। द्यौर्नः॑ पि॒ता पि॑तृयाच्छं भ॒वासि॑ जा॒मि मि॒त्वा मा

वि॒वि॒श्चि॒सि लो॒कात्। यत्र॑ सु॒हार्दः॑ सु॒कृतो॑ म॒दन्ते॑ वि॒हाय॑ रोगं
 त॒न्वा(१)॑ꣳ स्वाया॑म्। अ॒श्लो॒णाङ्गैर॑हु॒ताः स्व॒र्गे तत्र॑ प॒श्येम
 पि॒तरं॑ च पु॒त्रम्। यद॒न्नम॑द्भ्यनृ॒तेन॑ दे॒वा दा॒स्यन्न॑दा॒स्यन्नु॑त
 वा॑ करि॒ष्यन्। यद्दे॒वानां॑ चक्षु॒ष्यागो॑ अ॒स्ति यदे॒व किं
 च॑ प्र॒तिज॑ग्रा॒हम॒ग्निर्मा॑ तस्मा॑दनृ॒णं कृ॑णोतु। यद॒न्नम॑द्भि
 बहु॒धा वि॒रूपं॑ वा॒सो हि॒र॒ण्यमु॑त गा॒म॒जाम॑विम्। यद्दे॒वानां॑
 चक्षु॒ष्यागो॑ अ॒स्ति यदे॒व किं च॑ प्र॒तिज॑ग्रा॒हम॒ग्निर्मा॑
 तस्मा॑दनृ॒णं कृ॑णोतु। य॒न्मया॑ म॒नसा॑ वा॒चा कृ॑तमे॒नः
 कदा॒चन। सर्व॑स्मा॑त्तस्मा॑न्मेळि॒तो मो॒ग्धि॒ त्वꣳ हि॑ वे॒त्थ
 यथा॑त॒थम्॥